

АКАФИСТ ПРЕСВЯТЕЙ БОГОРОДИЦЕ В ЧЕСТЬ ИКОНЫ ЕЯ «ВЛАДИМИРСКАЯ»

Кондак 1

Взбранной Воеводе, Заступнице нашей, взирающе на первописанный образ Твой, хвалебное пение воспеваем Ти раби Твои, Богомати. Ты же, яко имущая державу непобедимую, сохрани и спаси благодарне Тебе вопиущия:
Радуйся, Пречистая, от иконы Твоей милости нам источающая.

Икос 1

Ангельские Силы на Небеси немолчно воспеваю Тя, Пречистая, зряще Славу Пребожественную, еюже Сын Твой прослави Тя; но и нас, земных, не оставила еси, яко некую лучу, низпославши нам икону Твою, святым Лукою первописанную. О ней бо некогда изрекла еси: «С сим образом благодать Моя и сила да пребудут». Темже вернии раби Твои, по вся дни и на всяком месте сбытие словес Твоих зряще, ко образу Твоему цельбоносному притекаем и, якоже Самой Ти, с нами сущей, вопием:
Радуйся, Ангелов Царице;
радуйся, всего мира Владычице.
Радуйся, на Небеси присно славимая;
радуйся, и на земли величаемая.
Радуйся, благодать Твою иконе Твоей сей даровавшая;
радуйся, на спасение человеков тую поставившая.
Радуйся, Божия благости скорая Подательница;
радуйся, молений наших усердная послушница.
Радуйся, Пречистая, от иконы Твоей милости нам источающая.

Кондак 2

Видя чудес множество, от принесенного в Вышград святыя иконы Твоей бываемое, благоверный князь Андрей возгореся духом и умоляше Тя, да скажеши святую волю Твою и да благословиши его в пределы Ростовских отъти. Темже, улучив желаемое и икону Твою взем, идяше в путь свой, радуяся и пой Богу: Аллилуя.

Икос 2

Разумеша вси людие дивное шествие Твое, Царице Небесная, от Киева в землю Ростовскую, болящий бо исцеляхуся и ина знамения и чудеса бываху всем с верою притекающим ко образу Твоему. Сего ради воспеша Тебе:
Радуйся, чудесы шествие иконы Твоей знаменавшая;
Радуйся, многи немощные исцелившая.
Радуйся, вздохания наша не отвергающая;
Радуйся, недостойные молитвы наша приемлющая.
Радуйся, Матерния щедроты Твоя на нас изливающая;
Радуйся, иконою Твоей нам благодеющая.

Радуйся, во обстоянии сущим скорую помощь дарующая;
Радуйся, отчаянным надежду возвращающая.
Радуйся, Пречистая, от иконы Твоей милости нам источающая.

Кондак 3

Силою Твою ограждаем, благоверный князь Андрей предел Владимирских достиже и зде благую волю Твою, Владычице, позна. В нощном бо видении тому явльшися, повелела еси от места сего не отходить и чудотворную икону Твою зде, во граде Владимире, поставить, да будет Северней стране нашей в благословение и людем Твоим в покров, вопиющим Богу: Аллилуиа.

Икос 3

Имея в себе благодатное сокровище - икону Твою Владимирскую, преуспеваše от силы в силу Отечество наше. Во дни бо обстояний и напастей не оставила еси род наш, Владычице, и во благовремении близ была еси, всесильным представительством Твоим верные люди Твоя заступающи, поющия Ти:

Радуйся, гнев Божий, праведно на ны движимый, утоляющая;
Радуйся, на милость к нам, грешным, Господа преклоняющая.
Радуйся, яко смиренным мольбам рабов Твоих внемлеши;
Радуйся, яко утешение Твое нам подати поспешаши.
Радуйся, яко иконою Твою от всяких нас бед ограждаeshi;
Радуйся, яко тою козни вражия разрушаeshi.
Радуйся, в час скорби люди Твоя укрепляющая;
Радуйся, тихое и безмятежное житие тем дарующая.
Радуйся, Пречистая, от иконы Твоей милости нам источающая.

Кондак 4

Бурю помышлений сумнительных пройде благоверный князь Андрей, от множества врагов некогда обстоимъ: Ты же, Всепетая, дивным от иконы Твоей знамением славную победу тому предзвестила еси. Темже верою обновився и о имени Твоем дерзая, воспе Богу: Аллилуиа.

Икос 4

Слышавше мятеjницы убиение благоверного князя Андрея, град Владимир расхитити устремишася, но икону Твою чудотворную, на стогна града изнесенную, внезапу узревше, умилишася сердцем и на колена падше во гресе своем покаявшася. Благочестивии же людие, таковому от иконы Твоей благодатному явлению радующеся, песнь благодарственную воспеша Тебе:
Радуйся, междуусобных браней утоление;
Радуйся, ожестевших сердец умягчение.
Радуйся, яко заблуждшия на путь правый возвращаeshi;
Радуйся, яко от соблазнов суетных нас ограждаeshi.
Радуйся, пагубы вседушевныя низлагающая;

Радуйся, душевредная научения обличающая.
Радуйся, к Царству Небесному путь невозбранный нам указующая;
Радуйся, мир вечный и радость нам подающая.
Радуйся, Пречистая, от иконы Твоей милости нам источающая.

Кондак 5

Боготечная звезда отцем нашим бысть икона Твоя, Владычице, еяже светом ведоми, многажды побеждаху царствия, возмогаху от немощи, обращаху в бегство полки чуждих и путь к земному преуспению и небесному спасению обретаху. Сего ради по долгу славит Тя земля Российская, поющи Богу: Аллилуя.

Икос 5

Видевше некогда людие владимиристии в чуднем видении град свой на воздухе вознесен и икону Твою верху его, якоже солнце, сияющу, со умилением разумеша, Владычице, неотступный покров Твой граду их и, Твое милостивое промышление о них славяще, воспеша Ти:

Радуйся, Мати милосердия; Радуйся, Источниче чудес.
Радуйся, бодрая наша Хранительнице;
Радуйся, граду нашему Покрове.
Радуйся, горе к Небесным сокровищем ум наш возводящая;
Радуйся, любовь к Богу в сердцах верных насаждающая.
Радуйся, маловерныя вразумляющая;
Радуйся, неверных смыслы просвещивающая.
Радуйся, Пречистая, от иконы Твоей милости нам источающая.

Кондак 6

Проповедник неизреченных чудес Твоих, Владычице, явися соборный храм Твой во граде Владимире, святою иконою Твою украшенный. Попущением бо Божиим все благолепие его некогда во огни погибе, икона же святая Твоя, яко же купина неопалима пребысть, да и видевше и осязавше присутствие Твое, вернии воспоют: Аллилуя.

Икос 6

Возсия паки свет иконы Твоей, Богородице, во дни лютаго нашествия Батыева. Аще бо нечестивии агаряне и пожгоша огнем соборный храм Твой и святителя Владими爾ского и люди, молящияся в церкви, умертвиша и вся конечному истреблению предаша, обаче икона Твоя и паки невреждена обретеся, подвизающи пети Тебе: Радуйся, Купино Неопалимая:
Радуйся, Сокровище неиждиваемое.
Радуйся, Стено несокрушимая;
Радуйся, Прибежище всем уповающим на Тя.
Радуйся, икону Твою и во пламени целу сохранившая;
Радуйся, нам во утешение и спасение тую оставившая.

Радуйся, Ты бо еси наше Защищение;
Радуйся, Ты бо еси всех благочестивых непрестанное радование.
Радуйся, Пречистая, от иконы Твоей милости нам источающая.

Кондак 7

Хотя великий князь Василий защищение стяжати стольному граду своему, повеле Владимирскую икону Твою в Москву пренести. И во сретение ея усердно исшедшему князь и святитель Московский Киприан со освященным Собором и всем множеством людей, до земли пред нею поклониша, якоже бо Самую Тя, Пречистая, к ним приходящую сретаху, зовуще Тебе: "О Мати Божия, спаси землю Русскую", вкупе же и погоще Богу: Аллилуиа.

Икос 7

Новое знамение сотворила еси, Пренепорочная, в день празднования сретения иконы Твоей Владимирской в Москве: в грозном бо видении, яко всемогущая Царица, множеством воинств Небесных обстоима, со святителями Московскими явилася еси нечестивому агарянскому хану и от предел земли Русской отъти повелела еси. Тогда вернии людие Твои, врага видевше посрамлена и бежаща, с веселием пояху Тебе:
Радуйся, победо непобедимая;
Радуйся, Царице Небесных Сил.
Радуйся, врага грозное посрамление;
Радуйся, рабов Твоих Радосте нечаянная.
Радуйся, Надеждо всех лишенных надежды;
Радуйся, спасение во дно адово нисшедших.
Радуйся, пришествием иконы Твоей Москву возвеселившая;
Радуйся, заступленном Твоим и град Владимир не оставившая.
Радуйся, Пречистая, от иконы Твоей милости нам источающая.

Кондак 8

Странную победу всесильною помощью Твою, Владычице, без брани совершившуюся, и до ныне Церковь Православная светло прославляет. Сретение иконы Твоей Владимирской празднующи и вся верная чада Своя созывающи милости Твоя благодарне исповедати, Сыну же Твоему и Богу пети: Аллилуиа.

Икос 8

Всю Тя Бог освяти, Пренепорочная, и яко Матерь Свою в готовое прибежище и теплый покров всем нам дарова. Темже от меньших земли и незнаемых возвеличиваясь благословенный Тобою град Москва, благочестно икону Твою почитай; вся бо племена русская воедино собра и область свою над окрестными языками от моря и до моря и даже до конец земли распростране, всем веру Христову возвещай, Тебе же вопия:

Радуйся, земли нашея забрало;
Радуйся, Церкве утверждение.

Радуйся, молитвенников наших похвало.
Радуйся, людей Твоих спасение;
Радуйся, враги наша устрашающая.
Радуйся, полки чуждих далече отгоняющая.
Радуйся, яко Тобою Русь Православная содержится;
Радуйся, яко Тобою род христианский хвалился.
Радуйся, Пречистая, от иконы Твоей милости нам источающая.

Кондак 9

Всякое естество ангельское восхваляет Тя, Богородительнице, у престола Сына Твоего предстоящую и за страну нашу и вся Христианы молящуюся. Мы же, людие Твои, молитв Твоих действо разумевающе, к чудотворней иконе Твой с любовию притекаем и Богу прилежно вопием: Аллилуия.

Икос 9

Витий земных художество не довлеет по достоянию благохвалити Тя, Пресвятая Всенепорочная, и иконы Твоей чудеса исчислити, имиже Церковь Православная величается, грады наша утверждаются и вси христиане Божественне веселятся. Темже за премногую любовь Твою к нам и вся милости Твоя приеми от нас сие хвалебное пение:

Радуйся, Собором святых, в стране нашей просиявших, окружаемая и славимая;
Радуйся, предстателей наших, чудотворцев российских, моления приемлющая.
Радуйся, ходатайством Твоим о нас Бога умилостивляющая;
Радуйся, честным покровом Твоим нас присно осеняющая.
Радуйся, страны нашей преславная Заштитнице;
Радуйся, призывающим Тя скорая Помощнице.
Радуйся, труждающихся благодатное укрепление;
Радуйся, кающихся грешников несомненное спасение.
Радуйся, Пречистая, от иконы Твоей милости нам источающая.

Кондак 10

Спасения ищуще, к Тебе прибегаем, Милосердная Мати, и, чудотворную Твою икону ныне обстояще, вся милости Твоя, тою отцем нашим явленныя, с любовию воспоминаем. Да не тщетна будет, Владычице, и наша надежда на Тя, на немощь нашу умилосердися и спаси вопиющая Богу: Аллилуия.

Икос 10

Стена еси и заступление всем с верою прибегающим к Тебе, Всеблаженная Отроковице, всегда бо милости Твоя роду христианскому являла еси и отцем нашим многочастне и многообразие благодеяла еси, от нашествия иноплеменных и от всякия беды и нужды тех избавляющи. Не оскудей и ныне, Владычице, утоляющи лютыя на ны возстания греховныя и облак искушений отжени, Тебе бо навыкохом пети:

Радуйся, Мати Божия, Матернюю любовь к нам, грешным, простирающая;
Радуйся, силою Твою нашу немощь восполняющая.
Радуйся, милосердие Божие разумети нас научаящая;
Радуйся, к делом милосердия и нас возбуждающая.
Радуйся, страх Божий в сердца верных влагающая;
Радуйся, грешники к покаянию призывающая.
Радуйся, невниманию нашему долготерпящая;
радуйся, от сна лености нас возставляющая.
Радуйся, Пречистая, от иконы Твоей милости нам источающая.

Кондак 11

Пение похвальное воспеша московстии людие, спасение Твое некогда улучивше:
верху бо явльшися, светозарною одеждю одеяна, храм Твой и град Москву от
запаления огненного ризою Твою защитила еси. Неотступна пребуди, Всемощная, от
места сего и ныне и нам избавление Твое видети даруй, да веселящеся воспоешь:
Аллилуя.

Икос 11

Свет радости возсияла еси, Владычице, и во дни тыя, егда смотрением Божиим
древняя красота церковная к нам паки возвратися и Священный Собор граду Москве
Патриарха, всей же стране нашей единаго пастыря и молитвенника утверди. Ты же,
Пречистая, от иконы Твоей Владимирская жребий первосвятительства сего
избраннику Твоему даровала еси, да расточенные овцы словеснаго стада Церкви
Российских паки воедино соберет. Сего ради вопием Тебе:

Радуйся, скорбящих радосте;
Радуйся, обуреваемых Пристанище.
Радуйся, в напастех нас не оставившая;
Радуйся, во унижении нашем свет надежды нам возсиявшая.
Радуйся, на смиренныя призвавшая;
Радуйся, низшедшая возвеличившая.
Радуйся, Церкве нашей Похвало;
Радуйся людей Твоих веселье.
Радуйся, Пречистая, от иконы Твоей милости нам источающая.

Кондак 12

Благодать Твою не отыми от нас, милости Источнице, якоже во дни лихолетия
святителей наших Иова и Ермогена услышала еси и землю Русскую от конечного
расхищения, православную же веру в ней от истребления спасла еси, да избавлении
Тобою Богу воспоешь: Аллилуя.

Икос 12

Поюще неисчисленныя милости Твоя, от лет древних роду нашему явленныя и доныне не
оскудевающие, хвалим Тя, Пречистая, яко неусыпную Хранительницу нашу и

заступление, и Матернюю любовь Твою к стаду Сына Твоего ведуще, со дерзновением, аще и раби неключими есмы, вопием Тебе:
Радуйся, Русь Православную возлюбившая;
Радуйся, веру истинную в ней утвердившая.
Радуйся, отцы наша во благочестии сохранившая;
Радуйся, и наше неможение не отринувшая.
Радуйся, Утверждение наше незыблемое;
Радуйся, Надеждо наша непостыдная.
Радуйся, Молитвеннице наша теплая;
Радуйся, Заступнице усердная. Радуйся, Пречистая, от иконы Твоей милости нам источающая.

Кондак 13

О Всепетая Мати, Заступнице Всемилостивая, Дево Богородице, обычным Твоим милосердием малое моление сие наше приемлющи, якоже древле, тако и ныне помилуй землю нашу Русскую и от всяких бед рабы Твоя избави, о Тебе вопиющия: Аллилуя.

(Этот кондак читается трижды, затем икос 1 и кондак 1)

Молитва

О Всемилостивейшая Госпоже Богородице, Небесная Царице, Всемощная Заступнице, непостыдное наше Упование! Благодаряще Тя о всех великих благодеяниях, в роды родов людем российским от тебе бывших, пред пречистым образом Твоим молим Тя: сохрани град сей (весь сию; святую обитель сию) и предстоящия рабы Твоя и всю Землю Русскую от глада, губительства, земли трясения, потопа, огня, меча, нашествия иноплеменных и междуусобных бран! Сохрани и спаси, Госпоже, Великого Господина и Отца нашего (имярек), Святейшего Патриарха Московского и всея Руси и Господина нашего (имярек), Преосвященнейшего епископа (архиепископа, митрополита) (титул), и вся Преосвященные митрополиты, архиепископы и епископы православные. Даждь им Церковь Российскую добре управити, верныя овцы Христовы негиблены соблюсти. Помяни, Владычице, и весь священнический и монашеский чин, согрей сердца их ревностию о Бозе и достойно звания своего ходити коегождо укрепи. Спаси, Госпоже, и помилуй и вся рабы Твоя и даруй нам путь земного поприща без порока прейти. Утверди нас в вере Христовой и во усердии ко Православной Церкви, вложи в сердца наша дух страха Божия, дух благочестия, дух смирения, в напастех терпение нам подаждь, во благоденствии - воздержание, к близким любовь, ко врагом всепрощение, в добрых делах преуспеяние. Избави нас

от всякого искушения и от окамененного нечувствия, в страшный же день Суда
сподоби нас ходатайством Твоим стати одесную Сына Твоего, Христа Бога нашего,
Ему же подобает всякая слава, честь и поклонение со Отцем и Святым Духом, ныне и
присно и во веки веков. Аминь.